

«Reglar la situaziun linguistica cuntradictoria»

Comité prepara iniziativa davart rumantsch en scola

DA FLURIN ANDRY / ANR

■ A l'avis da 25 personas rumantschas che s'en radunadas a Casti nun è la situaziun actuala davart il rumantsch en scola betg pli tolerabla. Perquai preparan ellas in'iniziativa populara. Sonda passada èn sa radunads 25 Rumantschas e Rumantschs a Casti per discussiunar la situaziun dal rumantsch en scola. In da quels era *Giusep Nay*, l'anteriur derschader federal. Las personas preschentadas da tut las regiuns rumantschas han constatà tenor el che la regenza nun haja reglà en la lescha da scola nagut davart il rg ed ils idioms en scola, quai nun è a lur avis betg tolerabel.

«Il cuntegn da l'iniziativa nun è anc definì»

Nay numna la situaziun actuala cuntradictoria: «La regenza permetta a vischnancas da turnar tar ils idioms, era sch'ins sa che la situaziun finanziaria dal chantun na lubescha betg d'edir meds d'instrucziun en tut ils idioms», menziuna Nay. A ses avis n'èsi betg sincer da dir che las vischnancas possian reintrodurir ils idioms, senza savair co finanziair ils meds d'instrucziun: «Perquai è la finamira da l'iniziativa da procurar ch'i vegnia fixà en la lescha da scola da maniera lianta e clera per tut las scolas tge che vala sco lingua d'alfabetisaziun. Quai è la chausa da regenza e cussegl grond e betg da la Dretgira administrativa.» Sche quai duess esser rg u idiom decida sco ch'el cuntescha il comité d'iniziativa pir anc. Il cuntegn, ils detagls da l'iniziativa vegn a definir il comité en in proxim pass. Quant ditg che quai dura è tenor



Vincent Augustin, Giusep Nay, Martin Jäger e Domenic Toutsch.

el grev da dir: «I dependa quant spert ch'ins è d'accord cun il text d'iniziativa, quai dovra ses temp», di Giusep Nay. Er la data da la proxima radunanza dal comité d'iniziativa nun è anc fixada. Il lieu nua che quella vegn ad esser dependa da la glieud che far part dal comité: «*Giusep Blumenthal* ha ils nums da tut las personas che sustegnan noss'iniziativa, mia incumbensa è da dar il sustegn giuridic», di il giurist, «davart il cuntegn ston ils auters decider, jau mirel alura ch'i saja giuridicamain correct.»

Posiziuns pir cur ch'il text d'iniziativa è definì

Cusseglier guvernativ *Martin Jäger* di che tar ina democrazia tutga er il dretg da far iniciativas: «Ma avant ch'il cun-

tegn da questa iniziativa è enconuschent na vuless jau betg prender posiziun.» El ha chapientscha che tuts na sajan betg cuntenuti cun la situaziun actuala, «nus avain però ina clera legislaziun e la regenza agescha tenor quella.» Era *Vincent Augustin* che presidescha la Lia Rumantscha (LR) na vul anc betg prender posiziun en chausa: «Ils aspects materials che quests iniziants tractan han da far cun cas pendants tar la Dretgira administrativa, quai èn cas en connex cun la decisiun da tschertas vischnancas en Surselva ed era en Val Müstair da returnar a l'alfabetisaziun idiomatica», di el, «jau pens ch'i saja tant sco politicher sco era sco president da la LR meglier da spetgar las sentenzas da la dretgira, avant che sa dumandar tge ch'ins sto, po e vul far.» Augustin

avess gugent prendì part era el da la sesida dals iniziants a Casti, nun ha però pudì far quai, causa collisiun da terminis. Sonda ha el prendì part da la radunanza generala da la Surselva Rumantscha a Breil. Posiziun prenda dentant *Domenic Toutsch*, il co-president da la Pro idioms.

«Uss fiss il temp da tschertgar ina via cuminaivla»

«Era sche jau nun enconusch anc ils detagls ed am bas mo sin lur comunicaziun cumparida en La Quotidiana hai jau l'impressiun ch'ils iniziants vulan chattar ina via per sfurzar la Rumantschia d'introdurir dapertut il rg sco lingua d'alfabetisaziun», deplorescha Toutsch. A ses avis fan ins uschia donn al rumantsch: «Las decisiuns da nume-

rusas vischnancas da turnar tar l'idiom sco lingua da d'alfabetisaziun mussan che la gronda part da la Rumantschia vul restar tar ils idioms.» Da vulair sfurzar il rg sco lingua da scola gia en l'emprima classa avess per el per consequenza che diversas vischnancas al cunfin linguistic tschernissan il tudestg sco lingua da scola. «Sche tut ils Grischuns pudesan decider davart la lingua d'alfabetisaziun en scolas rumantschas èsi bain probabel che la gronda part dals Rumantschs schessan na al rg», cuntinuescha'l, «la maioritad tudestga dentant schess gea, introducì il rg, quai ans custa damain.» A ses avis fissi uss ura e temp da tschertgar ensemen ina soluziun acceptabla per tut las parts, di Domenic Toutsch, «e na vulair sfurzar insatge che mo paucs vulan.»